

Акафист Успению Пресвятой Богородицы.

Кондак 1

Избрáнной от всѣх родов Божией Матери и Цари́це,/ восходящей от земли к Небесí,/ благоговѣйная пения о пречестнем Твоем Успѣнии/ приносим раби Твои, Богорóдице./ Ты же, яко имущая победу над смѣртию,/ от всяких нас смертоносных бед свободи, да зовѣм Ти:// Радуйся, Обра́дованная, во Успении Твоем нас не оставляющая.

Икос 1

Ангел предстатель послан бысть рещи Богородице ко премирным Ея возшествие и приити предъявляше к Ней Сыну Ея и Богу, светло о Ней блистаяся и стоя, зовый таковая:

Радуйся, прерадованная Мати Царѣва;/ радуйся, небесная Царице, Мати Бога и Господа Небесé и земли.

Радуйся, предпочтенная превеличеством пришествия к Тебе Сына Твоего и Бóга;/ радуйся, возвеличенная извещением Твоего к Сыну отшѣствия.

Радуйся, от всех родов Богом избранная; радуйся, святое вместилище Слова Бóжия.

Радуйся, пророческаго проречения исполнѣние;/ радуйся, Апостолом пречестный вѣнче.

Радуйся, святителем украшение и священником доброто;/ радуйся, правителем удобрение и держáво.

Радуйся, богомудрых иноков возведение к горнему Цáрствию; радуйся, отверзающая райския двери христианскому роду, присно Тя блажащему.

Радуйся, Обрадованная,/ во Успении Твоем нас не оставляющая.

Кондак 2

Видяще апостолов лик, всесильным мановением от конец земли на облацех представших ко Пречестному Твоему, Пренепорочная. успению, священноначальницы: Дионисий - небесный таинник, Иерофей дивный и Тимофей с Боголепною честью священства пояху Богу: Аллилуиа.

Икос 2

Разумная вся тварь, старейшая чиноначалия ангельская приидоша со своим

Царем, Иже во Своя живоначальнейшия руце душу Матере Своея прият; теплый же верою Петр со слезами многая к Ней изрече, зовый:

Радуйся, ко премирным, Мати Творца миру, восходя́щая;/ радуйся, к пренебесным, пространнейшая небес, взёмлющаяся.

Радуйся, четверочастное стихий освятившая Твоим восхожде́нием;/ радуйся, Небесных возвеселившая Твоим прехожде́нием.

Радуйся, во Иерусалим горний прекрасный прия́тая;/ радуйся, в нерукотворенныя храмы прерадостно вше́дшая.

Радуйся, Херувимов и Серафимов Цари́це;/ радуйся, Архангелов Влады́чице.

Радуйся, прибежище верных и избавле́ние;/ радуйся, достоянию Твоему помощь и защище́ние.

Радуйся, о всем мире христианстем к Богу Ходата́ице;/ радуйся, благ всяческих Всеблагая Подате́льнице.

Радуйся, Обрадованная, / во Успении Твоём нас не оставляющая.

Кондак 3

Сила Вышняго восхити от Индии Фому, за некое изволение Божие не прилучшуся ему в пречестное успение Богоматере, и предпостави живоприемному Ея гробу, иже, Преставльшуюся приник видети, уразуме вознесенную на Небеса с телом и, веровав, о сем возопи: Аллилуиа.

Икос 3

Имея в себе помышление ученик, яко Божиим смотрением бе ему не обрестися ко провождению Богоматере с прочими вкупе, обрадован быв о бессмертнем Ея Успении, сия вопияше к Ней:

Радуйся, восприемлемая от земли дланьма Сы́на Твоего;/ радуйся, ко превышним возшедшая наслаждаться славы Его.

Радуйся, провождаемая от всех чиноначалий ангельских в Го́рняя;/ радуйся, подъемлемая Херувимы в Небесная и наднебе́сная.

Радуйся, в Небесных вратах от старейших Сил велелепно песньми возноси́мая;/ радуйся, от всех Небесных граждан окружаемая и блажи́мая.

Радуйся, Небо земное, к горнему селению возвы́шенное;/ радуйся, Престоле Господень, от земли вознесенный в Царствие Небе́сное.

Радуйся, предстательство наше и крепкое заступлѣние;/ радуйся, грешником Споручнице во спасѣние.

Радуйся, Христианом Царице и по Бозе надеждо Небеснаго Цѣрствія;/ радуйся, Мати Живота и по Господе нам упование жизни вѣчныя.

Радуйся, Обрадованная, во Успении Твоём нас не оставляющая.

Кондак 4

Бурю внутрь имея помышлений неверных евреин Аффоний, и зря Богоносными апостолы Богоматере Пречестное Тело всечестне ко гробу несенное, ко опровержению устремися; внезапно же, егда со ослеплением очию руце его отъяте ко одру прилеплена висясте, верою Матерь Божию исповедаше, вопия Богу: Аллилуиа.

Икос 4

Слышавше таинницы и самовидцы Слова Ангелов, поющих превышними песньми при погребении Богоприятнаго тела Божия Матере, и честь подати хотяще Богоугодную, потщашася согласно пети, глаголюще:

Радуйся, благовестие приемшая о прешествии Твоём в Горнее Цѣрствіе;/ радуйся, от благовестившаго Гавриила приемшая радостнаго рая вѣрвие.

Радуйся, пречестное херувимское множество просветившая;/ радуйся, преславное серафимское естество возрадовавшая.

Радуйся, от патриархов прообразованная; радуйся, от пророков предвозвѣщенная.

Радуйся, злую дерзость Аффониеву скоро отмстившая;/ радуйся, исцеление томужде подавшая.

Радуйся, обратившая в веру Аффониево невѣріе;/ радуйся, верное того приемшая исповѣдание.

Радуйся, возводящая к Небеси любовь и веру к Тебе имущих;/ радуйся, спасающая верою имя Твое призывающих.

Радуйся, Обрадованная,/ во Успении Твоём нас не оставляющая.

Кондак 5

Боготечныя звезды, апостолы святіи, в поднебесней разсеянии ради Евангелія, восхищени быша на облацех, по широте воздушней, ко

погребению Матере Господни, Юже пеньми и песньми провождающе, с Невещественными взываху: Аллилуиа.

Икос 5

Видевше Боговидцы своего Владыку, в руке Матере Свояя душу приемша, и Господа Того разумевше, потщашася священнослова песньми благословне воспети Ю:

Радуйся, Царице, над всеми Царствующаго носившая;/ радуйся, и Сама рукама Его Сыновнима носимая.

Радуйся, скиптре царский в Христовой деснице;/ радуйся, в руке Ноя ветве голубицы.

Радуйся, жезле Ааронов, прозябший нетление;/ радуйся, крине неувядаемый, процветший безсмертие.

Радуйся, Богоотца Давида цевнице Богодохновенная;/ радуйся, пророчества его возставшая слово, псалтирю и гусли прекрасныя.

Радуйся, одушевленный святыни Господни кивоте; радуйся, в покой Господень воскресший наш животé.

Радуйся, скиние, от Херувимов осеняемая; радуйся, Святая святых, от Серафимов глаголемая.

Радуйся, Обрадованная, / во Успении Твоем нас не оставляющая.

Кондак 6

Проповедницы Богоноснии апостоли, по отшествии ко премирным Божию Матере во общем седении обычныя трапезы бывше и предложение части хлеба во Имя Господне возносяще, внезапно свыше Богородицу Царицу, пришедшую со светоносными Ангелы, зряху и, мир тем от Сына и Бога подавшую слышавше, возгласиша о сем: Аллилуиа.

Икос 6

Возсия нам Солнце правды, Христос Бог от Твоих пречистых ложесн, волею и благоразумием проповедания чрез Апостолы мир просвети и Тя, Богоматерь, от рода и в род прослави. Темже и мы вси ублажаем Тя, вопиюще Ти:

Радуйся, Присноблаженная от всех родов во веки;/ радуйся, благоутробная и милостивая на человеки.

Радуйся, ученическому лику обещание исполнившая;/ радуйся, присещением Твоим от Сына Твоего и Бога мир тому подавшая.

Радуйся, всежелательное святых и сладкое зрение;/ радуйся, преподобных матерей и дев святых всевеселящее радование.

Радуйся, преходящая райское селение праведных;/ радуйся, посещающая всех во славе небесней сущих.

Радуйся, начало человеческого спасения;/ радуйся, исполнение всех благих желания.

Радуйся, по Бозе, Царе царствующих, Богородице Царице;/ радуйся, по Господе господствующих, Владыце нашем, Госпоже и Владычице.

Радуйся, Обрадованная,/ во Успении Твоем нас не оставляющая.

Кондак 7

Хотящих всех с верою входити в храм Твой святой, Богородице, присно спасаеши и славящих Тя от всяких напастей и бед свобождаеши; темже и благоверным людям, присноблажащим Тя, победы на сопротивныя даруй и вся ко спасению прошения нам подавай, о сем молящимся Тебе и поющим Богу: Аллилуиа.

Икос 7

Новую показа тварь, явлься нам, всех Творец Господь Тобою, Богородице. Ты же сродное промышление о нас к Нему имущи, честне почитающих пречестное Твое Успение, прими сицевая Тебе вопиющих:

Радуйся, Мати Богу, избранная от земных;/ радуйся, превышшая земных и Небесных.

Радуйся, Херувимов и Серафимов горе превозшедшая;/ радуйся, лик ученический облаком ко погребению Ти доле совокупльшая.

Радуйся, Фому по погребении Твоем силою Божиею предпоставившая изряднее;/ радуйся, чрез него уверившая Твое на Небо с плотию преселение.

Радуйся, красотю всех добродетелей украшенная;/ радуйся, краснейшему паче сынов человеческих Сынови Своему сопричтенная.

Радуйся, яко финикс, плотию воскресшею процветшая;/ радуйся, яко кедр в Ливане небесном, умножившаяся.

Радуйся, древо живота, насажденное посреде рая превышняго;/ радуйся, ковчеже мысленный возвышенный в Горняя от потопа смёртнаго.

Радуйся, Обрадованная,/ во Успении Твоём нас не оставляющая.

Кондак 8

Странно в превышних ведуще Тя, Избранная, яко солнце, Владычице, внутрь пренебесных недомыслимых красот и неизреченных доброт, умильно к Сыну и Богу, дланьма Его держиму, возшедшую и прерадостно преклоньшуюся живоначальной Его деснице, о сем непрестанно вопием: Аллилуиа.

Икос 8

Вся бывши горе, к Небесным взята и, земных не оставляючи, Богомати, рукама Сыновнима носима, в незаходима вниде, во оный град всесветящий и прекрасный, Иерусалим вышний, Херувимы обстоима со всеми Небесными силами, идеже слышит поющих сия:

Радуйся, Еяже пресвятая душа в вышнем всесветлом Сионе вселяется;/ радуйся, Еяже и нетленное тело таможде с душою купно прославляется.

Радуйся, вшедшая в престольный град Самаго Вседержителя;/ радуйся, вознесшаяся в прекрасный рай Вышняго Насадителя.

Радуйся, пренесенная во град, основанный от камней всесвётящих; радуйся, введенная во ограду, обстоимую вои сил превышних.

Радуйся, превышше Небес во благолепие Божие взятая;/ радуйся, паче всех невещественных умов почтённая.

Радуйся, приносящая к Сыну Своему и Богу моление вёрных;/ радуйся, и Сама непрестанно у Престола Сына Твоего и Бога молящаяся о всём.

Радуйся, Предстательнице к Богу, мир спасающая;/ радуйся, Заступнице, роду христианскому от Бога дарованная.

Радуйся, Обрадованная,/ во Успении Твоём нас не оставляющая.

Кондак 9

Всякое естество ангельское превозносит Тя, Богородице, человечестии же роди вси Матерь Тя Божию славим и почитаем пречестное Твое Успение, Царице: Тебе бо ради земнии Небесным совокупаются, согласно поюще Богу: Аллилуиа.

Икос 9

Ветийства Боговещанных пророческих речений ныне зрим о Тебе сбывшаяся, Богородице, яко воистину Бога плотию родила еси нам. Темже таинству словесе Божия верующе, вопием:

Радуйся, закона и пророков главизно совершенная;/ радуйся, звездо Иаковля, Валаамом пророкованная.

Радуйся, одре Царя Великаго, вещанный Соломоном;/ радуйся, руно, орошенное Иисусом, образованное Гедеоном.

Радуйся, Неопалимая Купино, законоположником предзримая;/ радуйся, горо святая, мужем желания усмотренная.

Радуйся, лестнице небесная, Иаковом предвидимая;/ радуйся, двери непроходимая, Иезекиилем предзримая.

Радуйся, солнце селения Христова, псалмопевцем предъявленное; радуйся, таинство, многообразне пророки пронареченное.

Радуйся, пророческих глагол всех, предреченных о Тебе, конец принесящая;/ радуйся, Вышняго смотра вся за спасение мира совершившая.

Радуйся, Обрадованная, / во Успении Твоем нас не оставляющая.

Кондак 10

Спасти хотя мир, Иже всех Господь от земаго Тя рода избра в Матерь Себе и, нас ради быв человек, взыде, отнюдуже сниде, к Небеси от земли, и Тебе с Собою возведе ко пребыванию во славе вечней и соцарствованию с Собою, конца не имущему, Темже, яко Бог, слышит от всех: Аллилуиа.

Икос 10

Стена еси верным, Богородице Дево, и заступление всем, к Тебе прибегающим, ибо Небесе и земли Творец, от Тебе плотию прошед, Пречистая, духом и телом в Небесная Тя пресели, ко ближайшему предстательству о всех, ихже приглашати научи:

Радуйся, граде Царя Великаго верху горы Небесныя;/ радуйся, стено и покрове, не крыющийся от нашего притекания.

Радуйся, верным на враги пособствующая;/ радуйся, нашествия агарянская побеждающая.

Радуйся, веры благочестивыя недвижимое сохранение;/ радуйся, еретичествующих полков разорение.

Радуйся, радость и умирение миру сущая;/ радуйся, всегубительного ада поправшая.

Радуйся, воинствующих на плоть целомудрием изрядное венчание;/ радуйся, мученических подвигов всечестное прославление.

Радуйся, преподобных трудом Ходатаице блаженного упокоения;/ радуйся, иноком благоскорбящим Подательнице вечного радования.

Радуйся, Обрадованная,/ во Успении Твоем нас не оставляющая.

Кондак 11

Пение всякое Богодухновенных песней не довлеет от нас ко похвале всечестного Успения Твоего, Всехвальная Владычице, Царице Богородице, но усердно Тебе приносим, яко Матери Царя всех, смиренное моление наше, с Небесными чинми поюще Единому достойно прославляющему Тя Богу: Аллилуиа.

Икос 11

Светоприемная свеча истинного Света сущим нам на земли явльшиися, души просвещаеши и чтущих Твое всечестное преставление к разуму Божественному наставляеши, да поем Ти сицевая:

Радуйся, свеще неугасимая огня неведественного;/ радуйся, заре незаходимая Света невечернего.

Радуйся, луно, от Солнца правды облиставаемая;/ радуйся, светлосте, во тьме святящая.

Радуйся, светильниче, на свещнице превышнем поставленный;/ радуйся, источниче жизни, из гроба во свет изведенный.

Радуйся, Мати Света умного, благочестивых души просвещающего;/ радуйся, Мати всех Бога, озлобленных души утешающего.

Радуйся, уповающим на Тя живота конец непостыдный дарующая;/ радуйся, достояние Божиим и Своим рабом на Суде Сына Твоего одесную Его устрояющая.

Радуйся, Преблаженная, яко Тобою блажени есмы и мы, иже Помощницу Тя имамы;/ радуйся, Преблагословенная в род и род, яко Господь с Тобою, и

Тобою с нами.

Радуйся, Обрадованная, / во Успении Твоем нас не оставляющая.

Кондак 12

Благодать высокопрестольных славы, на небесех дарованную Богоматери, почтенной седением одесную Сына Ея и Бога видяще горнии умы, подъяша Ю Престоли и Силы, окружиша Начала и Власти, припадоша страшнии Херувими, Серафими и Господства, со Архангелы и Ангелы вопиюще: Аллилуиа.

Икос 12

Поюще всечестное Твое Успение, восхваляем вси ко пренебесным возшествие Твое, Царице Богомати. Ты же освяти, прослави и спаси всех, любовью поющих Тебе:

Радуйся, очистившая землю пречистыми ног Твоих стопами; / радуйся, освятившая воздух восхождением Твоим к Небеси.

Радуйся, на Небесный круг возступившая; / радуйся, вся доброты неизреченныя зрящая.

Радуйся, во славе приседаящая престолу Сына Твоего и Бóга; / радуйся, с Сыном и Богом вечно царствующая.

Радуйся, красото в деснице Господней, украшающая блажащих Тя всех Небесных; / радуйся, обрадовавшая надеянием на Тя всех земных.

Радуйся, облеченная в солнце, сияющая благодатию и славою всей вселенней; / радуйся, обещавшая сохранять и спасати призывающих Тя всех в поднебесней.

Радуйся, от христианских родов Мати Божия почитаемая и Богородица именуемая; / радуйся, от восток солнца до запад преславно и православно от всех благочестивых славимая.

Радуйся, Обрадованная, / во Успении Твоем нас не оставляющая.

Кондак 13

О Всепетая Мати Безсмертнаго Царя Небесе и земли, Христа Бога нашего, живущая и по смерти, нынешняя приношения о всечестнем Твоем Успении от нас приемши, в жизни сей и в смертном успении нашем от всякия напасти, бед и муки избави и Небеснаго Царствия нас, Царице, сподоби, о Тебе вопиющих: Аллилуиа. (Этот кондак читается трижды, затем икос 1 и кондак 1)